

十經同卷

佛說四無所畏經

增慧陀羅尼經

聖六字增壽大明陀羅尼經

佛說大乘戒經

佛說聖最勝陀羅尼經

佛說五十頌聖般若波羅蜜經

大乘八大曼拏羅經

佛說較量一切佛刹功德經

囉嚩拏說救療小兒疾病經

臨七

迦葉仙人說醫女人經

佛說四無所畏經

宋西天譯經三藏朝散大夫試鴻臚卿傳法大師施護奉詔譯

如是我聞一時佛在舍衛國祇樹給孤獨園
爾時世尊告諸苾芻汝等諦聽如來應正等
覺成就四無所畏於大衆中轉大法輪如師

子吼自在無畏時諸苾芻聞是語已五體投地頂禮佛足合掌白言云何如來四無所畏佛告苾芻我於往昔在大衆中而作是言如來成就正等正覺如是說時沙門婆羅門魔梵天人俱發言曰此所宣說非依法教未曾見聞有如是事爾時世尊於彼衆中無驚無怖心得安樂住無所畏又復告言我身清淨諸漏已盡如是說時沙門婆羅門魔梵天人俱發言曰此所宣說非依法教未曾見聞有如是事爾時世尊於彼衆中無驚無怖心得

安樂住無所畏復次告言二障雜染能障道果此障若滅聖道自現如是說時沙門婆羅門魔梵天人俱發言曰此所宣說非依法教未曾見聞有如是事爾時世尊於彼衆中無驚無怖心得安樂住無所畏復次告言修戒能七定等能出生死盡諸苦報如是說時沙門婆羅門魔梵天人俱發言曰此所宣說非依法教未曾見聞有如是事爾時世尊於彼衆中無驚無怖心得安樂住無所畏佛告苾芻是名如來轉大法輪四無所畏復次苾芻亦於

八大衆中具足成就四無所畏云何爲八昔
於一處有無數百沙門衆或住或立或行或
坐互相言曰往昔佛說如是法相甚深難解
未曾見聞爲是爲非爲虛爲實爾時如來聞
彼言已心無怯懼身無毛豎自在無畏如山
不動復次無數百婆羅門衆無數百刹帝利
衆無數百居士衆無數百四天王衆無數百
忉利天衆無數百魔王衆無數百梵天衆如
是八衆或住或立或行或坐互相言曰往昔
佛說如是法相甚深難解未曾見聞爲是爲

非爲虛爲實爾時如來聞彼言已心無怯懼
身無毛豎自在無畏如山不動佛言苾芻是
名八部大衆之中得無所畏即說頌曰
如來自在轉法輪 昔能成就四無畏
天人魔梵及沙門 聞師章句懷猶豫
身心不動得無畏^{臨七} 利樂一切諸有情
令發無上菩提心 恭敬修行到彼岸
爾時諸大苾芻聞佛所說信受奉行
佛說四無所畏經